

## **ALCUERDU ENTE'L PARTÍU SOCIALISTA OBRERO ESPAÑOL DE XIXÓN YA IZQUIERDA XUNIDA-BLOQUE POR ASTURIAS-LOS VERDES DE XIXÓN PA LA FORMACIÓN DE GOBIERNU NEL AYUNTAMIENTU DE GIJÓN/XIXÓN PAL MANDÁU 2007-2011.**

Los resultaos de les eleiciones municipales celebraes el pasáu 27 de mayu, espresen la voluntá de la ciudadanía de Xixón por seguir dando'l so apoyu a la formación d'un gobiernu llocal integráu pol Partíu Socialista Obrero Español y pola coalición formada por Izquierda Xunida, Bloque por Asturias y Los Verdes. Un equipu de gobiernu que siga desendolcando'l modelu de Xixón que se configurare durante los caberos años.

Más allá d'inevitables discutinios puntuales, esti Alcuerdu ye la espresión d'una conceición de la ciudá compartida por toles organizaciones que lu roblen. Un Xixón de progresu, pensáu pa les persones, solidariu, cultu, prósperu, con unos servicios públicos bien afitaos y de calidá que constitúin una garantía de la igualdá d'oportunidaes pa tola ciudadanía. Un Xixón amable, homoxeneu nel so desarrollu territorial, equilibráu nel so tratamientu de los barrios, con un movimientu ciudadanu implicáu na vida cotidiana. Un Xixón levantáu na convivencia dende'l respetu a la diversidá, la tolerancia y la solidaridá. Éstes

son les carauterístiques coles que s'identifica Xixón y que constitúin les seños d'identidá coles que'l gobiernu municipal se compromete pa que la nuestra ciudá siga siendo cada día más igualitaria, más tolerante, más abierta, más integradora y más solidaria.

Afitar les bases pa seguir avanzando nel desarrollu d'esti modelu de ciudá durante'l mandáu municipal 2007-2011 ye'l propósiu d'esti documentu y la voluntá explícita de los que lu roblen, concretáu nos alcuerdos que se recueyen darréu.

### **Actividá económica y emplegu**

Xixón esperimentó una importante tresformación económica durante los caberos años, hasta'l puntu d'algamar los meyores resultaos históricos en términos d'ocupación y d'actividá económica. El nuevu gobiernu municipal camienta qu'esti momentu ye decisivu p'afitar el trabayu fechu durante esti tiempu, y afitar el crecimentu de l'actividá económica y del emplegu como elementos cimeros d'un desarrollu social equilibráu que tien de ser medioambientalmente sostenible.

Como oxetivu principal aspiramos algamar la cifra de 10.000 empregos más a lo cabero la llexislatura, porque l'emplegu sigue siendo'l principal problema percibíu pola ciudadanía de

Xixón. Un emplegu que tien de ser estable y de calidá, teniendo a la mocedá y les muyeres como principales destinatarios.

P'algamar esti oxetivu les organizaciones que roblen esti alcuerdu propondrán-y al gobiernu asturianu la ellaboración d'un **Plan Industrial d'Asturies** y desenvolverán una estratexa económica na que va garrar más puxu l'**apoyu a les pequeñes y medianes empreses llocales**, que son les que xeneren la mayor parte del emplegu de calidá y l'actividá económica de la ciudá, prestando especial procuru a les actividaes industriales, a los servicios relacionaos a la producción y a les actividaes terciaries de calidá y valor añadíu.

La participación ya implicación de les empreses y los sindicatos na estratexa económica municipal amuésase perimportante, poro, el nuevu gobiernu va proponer a los axentes sociales la negociación y l'alcuerdu d'un **nuevu pautu llocal pola competitividá y l'emplegu** nel que se desarrollen los oxetivos d'esti alcuerdu, y del que va formar parte un plan de dinamización empresarial.

Dende'l nuevu gobiernu **va siguir desarrollándose'l suelu industrial** planiáu, como elementu imprescindible pa que seya posible'l desarrollu económicu xeneral y, en particular,

l'industrial. Pa satisfacer les necesidaes específiques de les empreses d'orientación teunolóxica, **vamos ampliar el Parque Científicu y Teunolóxicu**. Asina mesmo, vamos seguir desarrollando naves modulares p'atender la demanda fecha poles empreses.

El gobiernu llocal robla'l so compromisu col **mantenimientu de la catalogación como suelu industrial** d'espacios ocupaos polos astilleros y el Tallerón, asina como los terrenos que nel so momentu puean ser lliberaos pola Mina La Camocha.

Dende'l nuevu gobiernu va sofitase la realización d'una **promoción conxunta del puertu d'El Musel y de los espacios industriales complementarios**, por tratase d'infraestructures económicques necesaries que permiten dixebrar la ufierta de Xixón respeto a otres ciudaes del Arcu Atlánticu.

Vamos dotar d'un **fundu p'apoyar a los proyeutos nuevos**, vamos desarrollar aiciones pa fortalecer la rellación de les empreses de Xixón, sobre manera PYMES, col Campus Universitariu, sofitando actuaciones que-yos faciliten a estes empreses l'accesu a la renovación y a los recursos nacionales y europeos qu'esisten pa esti fin.

El nuevu gobiernu formáu pol PSOE ya IX-BA-LV daráy puxu a midíes pa facilitar la efeutiva inserción llaboral de **persones en riesgu d'arrequexamientu social**. Asina mesmo, va sofitar la puesta en marcha de programes específicos empobinaos al **mediu rural de Xixón**, con especial procuru na agricultura ecolóxica.

## Vivienda

L'accesu a una vivienda asequible ye un drechu de les persones y facilitalu ye una xera qu'IX-BA-LV y PSOE asumen como un compromisu del nuevu gobiernu. En resultes, los oxetivos pal próximu mandáu cuantifíquense n'algamar **5.000 viviendes** que disfruten de dalguna figura de proteición en Xixón y **ampliar dafechu les ayudes al alquiler**, tanto na so cuantía como na so duración.

El nuevu gobiernu llocal comprométese a desenvolver una estratexa global sobre vivienda, tanto no que cinca a vivienda n'alquiler como en propiedá. Nesti sen, les organizaciones que roblen l'al cuerdu van proponer a SOGEPSA la dinamización de la construcción y entrega de les nueves viviendes desarrollaes nel nuevu área residencial de Roces.

El PSOE ya IX-BA-LV espresen la so voluntá de facilitar

qu'EMVISL actue como promotora de viviendes que disfruten de dalgún grau de proteición autonómica y que, cuando seya posible, faiga la seleición de los beneficiarios y la entrega de les llaves de toles viviendes de proteición. Asina mesmo, estes organizaciones comprométense a dotar d'un **nueva sede a la Empresa Municipal de la Vivienda**, por tratase d'un elementu cimeru tanto pa prestar un meyor serviciu a la ciudadanía como pa ver la importancia que se quier dar a esta política.

Como ferramienta decisiva pal cumplimientu de los oxetivos d'esta política, va seguir executándose una **rápida xestión del suelu disponible del conceyu**, facilitando l'accesu de les **cooperatives** al empar qu'intensificando l'intercambiu d'información ente l'área de Patrimoniu y EMVISL sobre'l suelu de propiedá del conceyu.

L'apoyu al alquiler de viviendes constitúi otra gran llinia de trabayu asumida pol gobiernu llocal. Nesti campu va actuase en dos ámbitos: per un llau, movilizando la ufierta privada de viviendes pal alquiler, pente medies de la puesta en marcha de midíes que faciliten la salida al mercáu de viviendes desocupaes. D'otra miente, reforzando l'apoyu a les persones qu'opten pol alquiler, al traviés de la **revisión de los criterios**

**polos que s'accede a les ayudes**, pa facilitar que lleguen a más persones, sobre manera la xente mozo, y durante más tiempu, al posibilital que'l **plazu máximu pa disfrutar d'ayudes seya de 5 años**.

### **Servicios a les persones**

El nuevu equipu de gobiernu del conceyu quier siguir desarrollando **polítiques que-y aseguren a tola ciudadanía'l plenu exerciciu de los sos drechos individuales y coleutivos**, con autonomía personal ya igualdá efeutiva ente muyeres y homes.

Les organizaciones que roblen l'alguerdu van a da-y puxu, dende'l gobiernu municipal, al desarrollu d'aiciones d'**apoyu a les families**, col oxetivu de poder compaxinar la vida llaboral y familiar, participando na crianza y educación de los fíos y fíes.

**Los neños y neñes** son persones con drechos colos qu'ha de cuntase y sobre los que tien d'intervenise socialmente, tanto pa la so proteición como pa facilitá-yos les mesmes oportunidaes de vida. Tienen de garantizase los drechos individuales de la infancia, no que cinca a la prestación de servicios y a la so participación social.

Xixón, les sos infraestructures y los sos servicios tienen d'ufir un entornu bayurosu y estimulante que potencie'l desarrollu integral de los neños y neñes, con actuaciones que tienen que planificase dende dellos ámbitos del conceyu.

Poru, amás de midíes como la creación de nuevos centros de 0 a 3 años y l'apertura de dellos centros durante 11 hores y 11 meses, PSOE ya IX-BA-LV van poner en marcha otros programes, ente los que ta la **orientación educativa a les families, colonies urbanes de branu**, campamentos de ñatura de día y visites guíes a los principales equipamientos del conceyu. Asina mesmo, comprométense a l'**ampliación y meyora de les zones de xuegos pa neños y neñes**, actuando sobre más de 60 espacios ya instalaciones, y a colaborar colos centros educativos nel desarrollu d'**actividaes estraescolares de calidá**, qu'ayuden a los neños y neñes a medrar, que-yos averen a la cultura, la música o'l deporte, y que fomenten los valores d'igualdá y respetu. Estes actuaciones van formar parte del desarrollu del *Plan Integral de la Infancia* que, nel so casu, va ser sofitáu pol Principáu d'Asturies.

Les **persones mayores** constitúin un sector importante, pal qu'han d'asegurase programes y actuaciones que faciliten que

les persones seyan autónomes durante'l mayor tiempu posible. Nesti sen, IX-BA-LV y el PSOE van facilitar la **progresiva puesta en marcha de centros de día nos barrios y distritos** de la ciudá, y establecen los oxetivos de **superar les 3.500 ayudes a domiciliu y 4.000 teleasistencies** como eficacies ferramientes pa l'autonomía personal. Asina mesmo, dende'l gobiernu del conceyu van desarrollase actuaciones pa da-y puxu a programes d'**avieyamientu activu**, que contemplen ociu, cultura, deporte o la instalación de xuegos p'adultos n'espacios públicos.

L'equipu de gobiernu va seguir apoyando y poniendo en marcha programes pa la **efeutiva integración de les persones con discapacidá**. Van tener continuidá los planes d'instalación d'ascensores y meyora d'accesos a viviendes y establecimientos públicos. Tamién va a promovese actuaciones pa eliminar les torgues qu'afeuten a persones con discapacidá auditiva o con deficiencias visuales. Va reforzase'l compromisu pa la integración llaboral y elevase penriba de los mínimos llegalos los cupos reservaos a les persones con discapacidá. Al empar, van promovese los programes d'ociu y deporte pa esti colectivu.

**La inmigración** ye una realidá social que va tener una presencia cada vegada mayor na nuestra ciudá. Poro, l'equipu de gobiernu formáu por PSOE ya IX-BA-LV va poner en marcha midíes que favorezan **la incorporación social de les persones inmigrantes**, asina como aiciones culturales y deportives que faciliten el conocimientu mutuu.

## **Educación**

IX-BA-LV y PSOE roblen el so compromisu cola educación, camentada como un gran serviciu públicu de calidá que ye garantía de llibertá, xusticia y cohesión social.

L'equipu de gobiernu considera una prioridá, tanto p'apoyar a les families como pa la compaxinación cola vida llaboral, la puesta en funcionamientu de **polo menos cuatro (4) centros nuevos pa neños y neñes de 0 a 3 años**. Amás, l'equipu de gobiernu va favorecer la integración nuna sola rede les tres redes públiques de centros de 0 a 3 qu'anguaño conviven en Xixón. En tou casu, procurará la so coordinación.

Col oxetivu de dotar al Centru de Xixón d'un gran centru escolar, el gobiernu municipal va collaborar col Principáu d'Asturies pa camudar l'actual edificiu de la Cátedra

**Xovellanos nun centru de primaria pa integrar les actuales escueles Xovellanos y Cabrales.**

Los centros escolares son equipamientos de referencia nel so entornu, polo que'l gobiernu llocal formáu por PSOE ya IX-BA-LV va puxar pola ellaboración d'un protocolu d'actuación que facilite l'**apertura de dellos centros durante 11 hores y 11 meses al añu.**

L'equipu de gobiernu va siguir desarrollando midíes pa lluchar escontra l'absentismu escolar y p'asegurar la efeutiva integración social y escolar de tolos coleutivos. Nesti sen va equilibrar la presencia del alumnáu inmigrante nos centros escolares. Poro, les organizaciones que roblen esti alcuerdu comprométense a da-y más importancia al Conseyu Escolar Municipal no que cinca a la determinación de los criterios d'escolarización.

El gobiernu llocal va desarrollar midíes de **reconocimientu ya incentivu de los méritos escolares**, l'esfuerzu y los valores de convivencia, tanto individuales como coleutivos.

## Cultura

El nuevu equipu de gobiernu va apostar pola cultura como elementu d'integración social, aportación de valores, y d'identificación como coleutividá.

IX-BA-LV y PSOE comprométense a desenvolver nel edificiu de Tabacalera un equipamientu que camude na referencia museística de la ciudá de Xixón, pal que la Xunta de Gobiernu municipal aprobará un plan d'usos.

El nuevu equipu de gobiernu comprométese a protexer y patrocinar el nuestru patrimoniu ya identidá cultural, al traviés del **sofitu a los deportes y la música tradicionales**. Nesti caberu casu, l'equipu de gobiernu, en coordinación col Principáu d'Asturies y el Conservatoriu de Música, va procurar soluciones pal asitiamentu y desarrollu curricular del enseñu de música tradicional.

Del mesmu mou, el gobiernu llocal **va fomentar l'usu institucional y públicu del asturianu** nel ámbitu del conceyu nos términos nos que s'alcuerte nel Pautu Autonómicu, creándose formalmente un Conseyu Asesor de la Llingua y ellaborando un plan d'usos y unes ordenances acordies cola

normativa vixente.

Les organizaciones que roblen esti alcuerdu van desenvolver aiciones encaminaes a mantener y recuperar la **Memoria Histórica de Xixón**, ente les que s'alcuenta l'apoyu y desarrollu de les actividaes na Ciudadela de Capua.

El gabitú a **les industries creatives** va ser una xera a desenvolver pol gobiernu llocal, qu'apoyará a los creadores de Xixón na promoción, distribución y comercialización de la so obra. Al empar, les actividaes relacionaes colos medios audiovisuales y la promoción de Xixón como *plató* cinematográficu van recibir el compromisu del equipu de gobiernu.

## **Deportes**

L'equipu de gobiernu llocal renueva'l so compromisu col deporte xixonés. Nesti sen, el nuevu gobiernu va poner en marcha un nuevu **sistema d'abonos pa que los clubs y entidaes deportives** puean abaratar los costes d'usu de les instalaciones. Asina mesmo, va ponese en marcha un programa de recursos compartíos pa clubs y entidaes. PSOE ya IX-BALV van apoyar dende'l gobiernu del conceyu la construcción de

**nueves infraestructures deportives**, ente les que s'atopen les que siguen darréu: una piscina en La Camocha, campos de fútbol pal Arenal y El Llano 2000, un nuevu polideportivu pa la zona de Ciales-Coto-Viesques y la creación d'un área deportiva complementaria a la qu'anguaño esiste nel entornu de Perchera-La Braña.

## **Salú**

El gobiernu municipal IX-BA-LV y PSOE, consciente de que la salú de les persones depende mucho de la rellación ente fautores socioeconómicos, medioambientales y d'estudiu de vida, asume como prioritaria la puesta en marcha d'aiciones de promoción de la salú. Pa ello, l'equipu de gobiernu comprométese a que Xixón, como ciudá que forma parte de la rede de ciudaes saludables, desarrolle un nuevu plan de **ciudá saludable** que va ser ellaboráu con participación social ya implicación de los sectores implicaos. Nesti plan van proponese y executase midíes concretes pa xeneralizar estilos de vida que favorezan la salú tanto a nivel físicu, como sicolóxicu y social. Otros desarrollos del citáu plan van abordar oxetivos rellacionaos cola meyora de los determinantes de la salú comunitaria en Xixón.

L'equipu de gobiernu llocal propónse contribuir a desenvolver la capacitación de la ciudadanía pa una **xestión más autónoma de la salú** y de los eventuales episodios de perda de la mesma, dientro del marcu de competencies llocales.

L'equipu de gobiernu llocal va apostar polos **Consejos de Salú** de zona, como espacios de participación de la comunidá pa promocionar la salú y velar pola calidá de los servicios públicos prestaos.

Les organizaciones del alcuertu de gobiernu nel Ayuntamientu de Xixón comparten la so apuesta y compromisu col sistema sanitariu públicu, que tien de prestar los sos servicios con calidá y procuru.

Dende'l gobiernu municipal van facese aiciones énte'l gobiernu d'Asturies p'ampliar l'Hospital de Cabueñes, da-y un serviciu d'hemodinámica y da-yos puxu a les actividaes de docencia universitaria ya investigación. Asina mesmo, el gobiernu municipal falará col Principáu d'Asturies p'articular mecanismos que permitan **dafechu l'adautación del mapa de salú de Xixón** a les necesidaes derivaes del desendolcu de nuevos espacios residenciales.

L'equipu de gobiernu llocal va facer por **una meyora integral de les urxencies**, que lleve a la descentralización, y poner especial enfotu na atención de les urxencies pediátriques.

## Igualdá

La igualdá ente muyeres y homes ye xera de compromisu ente los integrantes del nuevu gobiernu municipal de Xixón, qu'espresen la so solidaridá y **apoyu a les muyeres que son víctimes de violencia de xéneru**, y comprométense a siguir aplicando'l protocolu d'atención a les víctimes de violencia escontra les muyeres, qu'asegura una proteición integral al traviés de la coordinación de los medios municipales.

L'equipu de gobiernu favorecerá la **plena inserción llaboral de les muyeres**, con igualdá de salarios, drechos y oportunidaes de promoción profesional. Pa ello, y d'al cuerdu cola Llei d'Igualdá de recién aprobada, encamentarás-yos a los axentes sociales considerar esta cuestión nel nuevu pautu llocal pol emplegu. Amás, van facese planes d'igualdá nes empreses municipales, y desendolcaráse programes d'ociu y avieyamientu activu empobinaos a muyeres mayores y actuaciones específiques nel ámbitu de muyer y discapacidá.

Porque la igualdá ye tamién cosa d'homes, dende'l gobiernu municipal desarrollaremos midíes d'aición positiva empobinaes a éstos, que fagan pola so incorporación a les responsabilidaes doméstiques y a la ética del cudiáu, asina como pola orientación profesional, de muyeres y homes, que nun tea marcada pol sexu.

## **Mocedá**

Les organizaciones firmantes amuesen el so compromisu cola mocedá xixonesa, que ye l'activu más valiosu de la nuestra sociedá, la xeneración meyor formada y la garantía del nostru futuru colectivu. Darréu comprométense a facer una fuerte apuesta pa facilitar el so procesu de transición a la vida adulta y el so papel na vida ciudadana, al traviés del desendolcu d'estratexes que posibiliten la emancipación ya inserción sociolaboral, l'accesu a la vivienda, asina como l'aprovechamientu de la sociedá del so potencial n'ámbitos como la cultura, la creatividá, el deporte, l'ociu y el tiempu llibre, la solidaridá internacional o'l voluntariáu.

Nesi sen, una conceyalía con competencies nesta materia será la encargada de coordinar l'asignación de recursos destinaos a la

xente mozo y afitará les llinies estratéxiques que rexirán les polítiques municipales. Amás, el gobiernu llocal va dar un mínimu de **25 millones d'euros anuales** pa la execución de polítiques empobinaes a cubrir les necesidaes de la mocedá xixonosa, especialmente d'emplegu, educación, vivienda, movilidad y bienestar.

L'equipu de gobiernu municipal mantendrá una bona interlocución col **Conseyu de la Mocedá de Xixón (CMX)**, col que suscribirá nuevos alcuerdos de collaboración que contemplarán, ente otres cuestiones, la potenciación del centru de recursos pa que puea facer un serviciu meyor al movimientu asociativu xixonés; la coordinación del Centru d'Iniciatives Xuveniles de La Calzada dientro de la estructura de funcionamientu del CMX con respetu a les organizaciones qu'anguaño usen estes instalaciones, la collaboración con nueves árees municipales y la presencia en determinaos órganos d'asesoramientu municipal y participación. Amás, el PSOE ya IX-BA-LV comprométense a dar al CMX recursos p'asegurar un mantenimientu afayadizu de les sos instalaciones.

## **Mediu ambiente**

L'entornu nel que se desendolca la nuestra actividá, tanto

l'urbanu como'l periurbanu y el rural, inflúi mucho na calidá de vida de la sociedá. L'actividá humana fai por cambiar el mediu ambiente. Agora que somos dafechu conscientes de que'l cambiu climáticu yá ye una realidá o que l'agua ye un bien qu'hai d'usar con procuru, que toles persones ya instituciones tienen d'actuar responsablemente y tomar comportamientos y decisiones que tengan que ver cola sostenibilidá medioambiental.

Les instituciones tienen un papel importante a desendolcar, pero soles nun puen caltener el medioambiente, poro, les organizaciones firmantes deseyamos facer por un cambiu cultural nos nuestros valores y na rellación colo que nos arrodia. Comprometémonos col desarrollu sostenible, con una ciudá que seya quién a siguir medrando sin hipotecar el so futuru. D'esta miente'l gobiernu llocal siguirá desendolcando actuaciones de sensibilización ciudadana, de control de la contaminación acústica, d'actualización de les ordenances medioambientales y **sofitará les pequeñes y medianes empreses pa que puean cumplir les normatives medioambientales.**

PSOE ya IX-BA-LV darán-y puxu dende l'equipo de gobiernu

a actuaciones empobinaes al **aforru enerxéticu** nel ámbitu municipal. Nesti sen, siguirán metiendo enerxíes llimpies y renovables nos edificios públicos y vehículos municipales y garraránse elementos d'arquitectura bioclimática nos nuevos edificios públicos y nes promociones públiques de vivienda. Asina mesmo, y col fin de meyorar la eficiencia enerxética y la llumínica cambiaránse 5.000 puntos de lluz.

Les organizaciones firmantes d'esti alcuertu siguirán col so compromisu col agua, tomando midíes tanto nel ciclu del agua como na merma del consumu. Pa eso, intentarán andar con priesa na construcción de la **depuradora del Este** d'acordies colo conseñao nel conveniu robláu cola Alministración Xeneral del Estáu y el Principáu d'Asturies. Asina mesmo comprométense a afondar na rede de saniamientu na zona rural. L'equipu de gobiernu desendolcará midíes que favorezan la **reducción del consumu del agua**, metiendo sistemes d'aforru nel riego de les zones verdes. Amás, desendolcarán actuaciones de mantenimientu y meyora de les playes, de los ríos xixonese y pidirá a les Alministraciones titulares la bona conservación d'espacios públicos na ciudá.

A la **xestión de los residuos** va dase-y una vuelta nel equipu

de gobiernu municipal. IX-BA-LV y PSOE pondrán en marcha aiciones de sensibilización ciudadana pa facer pola recoyida selectiva, el reciclaxe y la reutilización de residuos, asina como ayudala al traviés de la instalación de **nuevos puntos llimpios**. Nesti sen, y en coordinación coles aiciones impulsaes por *Cogersa*, mirarásel desendolcu de nueves llinies ente les que s'atopa'l reciclaxe informáticu, de materia orgánica y d'aceites domésticos. D'esta mena, y cola fin de mirar pol cumplimientu de los compromisos de Kyoto, seguirán calteniéndose aiciones pal control de la contaminación urbana, les emisiones y el siguimientu de les instalaciones contaminantes.

L'equipu de gobiernu va facer pola incorporación de les teunoloxíes que mermen les **emisiones radioeléctriques** y guardará la baxa intensidá al rodiu de centros escolares y sanitarios.

Les organizaciones firmantes d'esti alcuerdu seguirán **enanchando y meyorando les zones verdes** de la ciudá, garrando'l compromisu d'actuar nos más de 50 espacios y algamar los 3,5 millones de m<sup>2</sup> de zones verdes a lo llargo'l mandáu, pa que persones de toles edaes y condiciones puean compartir ociu o deporte. L'enanchamientu del parque de los

Pericones, la intervención nos parques del Lauredal y Peña los Cuatro Xueces, la construcción d'un ivernaderu nel Xardín Botánicu y el remate del parque fluvial del Piles son dalgunes de les actuaciones que se desendolcarán nesti ámbitu.

PSOE ya IX-BA-LV espresen el so compromisu colos **drechos de los animales** y desendolcarán dende'l gobiernu llocal un parque pa perros.

L'equipu de gobiernu comprométese a reactivar el Conseyu Sectorial del Mediu Ambiente, como ferramienta de participación y diálogu na sociedá nes cuestiones medioambientales.

## **Movilidad**

Los efectos de la necesidá de treslladase tolos díes tienen una fuerte dimensión medioambiental, los sos efeutos algamen les emisiones de CO<sub>2</sub> o la contaminación acústica. L'actuación más importante nel ámbitu de la movilidad correspuende a la ordenación del territoriu, porque la meyor medida dende'l puntu de vista de la meyora de la eficiencia enerxética ye acurtiar les distancies ente'l domiciliu y los llugares de trabayu, ociu, educación y servicios.

Les organizaciones firmantes pensamos da-y puxu al **usu del tresporte colectivu**, meyorando la so accesibilidad. Un tresporte públicu que llegue a tolos puntos de destín, ufra un serviciu de calidá, curiosu, con velocidá comercial competitiva y con frecuencies abondes. Ye dicir, tresportes públicos orientaos pa cubrir les necesidaes de los veceros.

IX-BA-LV y el PSOE alcuerden echar andar **una estratexa de movilidad** na que se caltenga una xerarquía del repartu de los espacios públicos: peatones, ciclistes, tresporte públicu, repartu de mercancíes, motocicletes y turismu.

L'equipu de gobiernu dará-y **prioridá al peatón**, pa lo que s'engrandará y meyorará la calidá de los itinerarios a pie. Ente otres actuaciones, xuniráse al Paséu d'El Muro coles siendes fluviales del Piles y Peña Francia, dando conexón a les siendes costeres y peatonales yá feches.

El nuevu gobiernu **sofitará la circulación de les bicis** pela ciudá, facendo pola circulación compartida, los carriles-bici y les cais de circulación llenta, que complementarán los carriles-bici d'anguaño con nueves siendes urbanes que xunan dafechu Xixón d'Este a Oeste, facendo una rede de carriles-bici que se

completará con aparcamientos pa bicicletas y motocicletes.

PSOE e IX-BA-LV quieren que s'use'l **tresporte colectivu** y desendolcarán estratexes pa medrar y fidelizar a los veceros. Nesti sen, aplicarás una política de **tarifes reducíes** nel tresporte públicu urbanu: bonos a 6 meses, anuales y viaxes de baldre pa neños y neñes de menos de 12 años cola fin d'avezar a los mozos y ayudar a les families. Tamién s'actualizará la normativa pa meyorar l'accesibilidá al tresporte públicu colectivu. Amás, **estudiarás'l rediseño de dalgunes llinies** pa dar un meyor serviciu a los veceros y dar una bona comunicación colos polígonos industriales.

L'equipu de gobiernu desendolcará nueves árees peatonales y zones de tráficu pacificáu. Al mesmu tiempu dará-y puxu a la construcción de **nuevos aparcamientos públicos** nes distintes zones de la ciudá, destinaos sobre too a residentes y condicionaos a qu'haya una demanda pa les nueves places.

## **Infraestructures**

La intervención urbana más importante que se va facer nos años vinientes ye la intervención del suelu ferroviariu. Ye una operación importante pa integrar y comunicar la ciudá, que

necesita d'infraestructures básiques.

L'equipu de gobiernu instará a les alministraciones y entidaes responsables a la **prietas nes obres pa quitar la barrera ferroviaria, la construcción de la nueva estación intermodal y la llegada del Metrotrén a Cabueñes**. L'arranque del Metrotrén tendrá efeutos positivos na movilidad urbana, cambiando los fluxos y determinando les nueves centralidaes que nun tán bones de prever.

L'impautu d'esta circunstancia nes nueves necesidaes urbanes y de movilidad tienen de ser oxetu d'estudiu y analís p'anticipar estratexes de tresporte colectivu nes que se meyoren los medios de tresporte qu'haya. P'analizar la **introducción del tranvía** encargárase un estudiu téunicu y financieru con cargu al presupuestu del exerciciu 2008.

IX-BA-LV y PSOE comprométense a apostar por una **estación intermodal** integrada col entornu, que de pasu al soterramientu futuru pa contra Veriña y la prepare p'acoyer el ferrocarril d'alta velocidá. La continuación del soterramientu de Veriña ye un oxetivu d'esti gobiernu prioritariu una vez se fine lo proyectao nesti mandáu. Amás, l'equipu de gobiernu ratifica'l

compromisu de desdoblar a Juan Carlos I.

El gobiernu municipal espresa'l so compromisu col desarrollu del Plan de Vies, pa lo que sofitarán **l'ampliación del área especial del Plan de Vies** y el Plan Especial de dempués. L'agrandamientu del área hasta l'Avda. Príncipe d'Asturias, va facer medrar l'ámbitu d'actuación en más de 20.000 m<sup>2</sup>, que serán destinaos a usos públicos. El movimientu ciudadanu va sentise na concreción de los usos de los equipamientos públicos.

L'equipu de gobiernu programará'l desarrollu d'un **Plan d'Avenies** nel que se meterán, ente otres actuaciones, la reurbanización de les avenies Pablo Iglesias, Portugal, Rufo Rendueles, Ramón y Cajal y Manuel Llanceza.

L'equipu de gobiernu considera que la trama viaria xixonesa recibirá un impulsu colos nuevos accesos a El Musel, que se tienen de complementar cola meyora de la comunicación ente los puertos de Xixón y Avilés.

### **Servicios públicos**

PSOE e IX-BA-LV conciben al Ayuntamientu de Xixón como un elementu dinamizador de la ciudá, voceru de les inquietúes

de la ciudadanía y una institución dafechu dedicada al serviciu de la xente.

**Desarrollar bien les xeres que la Llei encomienda al Ayuntamientu de Xixón** ye la principal responsabilidá qu'assume l'equipu de gobiernu municipal. Y quier facelo col procuru y col envís de serviciu públicu, d'ufrir servicios de calidá, d'atención prioritaria a les persones que los usen. Les organizaciones firmantes asumen esta xera, conscientes de que sólo pue desendolcase col **sofitu comprometíu y la complicidá de les persones** que tolos díes faen que los servicios y empreses municipales furrulen como tienen de furrular.

IX-BA-LV y PSOE quieren que los servicios que se dean dende l' Ayuntamientu y les empreses municipales seyan cada vegada meyores. Pa eso, espresen el so compromisu cola desapaición de la fendedura dixital y cola **plena incorporación de les teunoloxíes de la información y de la comunicación a los servicios municipales**. El desendolcu de nuevos usos pa Internet, l'accesu al traviés del teléfonu móvil o de la televisión dixital son instrumentos que les organizaciones firmantes quieren seguir potenciando pa meyorar l'accesu a más servicios de calidá dende cualquier llugar y a cualquier hora.

El desenvolcu de les actuaciones nesti alcuerdu y los servicios públicos municipales de calidá necesiten de suficiencia financiera. Ésti tien de ser l'oxetivu del nuevu Pautu Llocal que se tien de desenvolver, y nel qu'hai que garantizar que tanto l'Alministración Xeneral del Estáu como les Comunidaes Autónomes dean a los Ayuntamientos los recursos necesarios pa que, dende l'autonomía municipal de la que fala la Constitución española, los servicios que la sociedá pide se dean con calidá.

Gijón/Xixón, 09 de xunetu de 2007

Por Izquierda Xunida – Bloque  
por Asturias – Los Verdes

Pol Partíu Socialista Obrero  
Español

Firmáu: Jesús Montes Estrada

Firmáu: José Manuel Sariego  
Martínez